


清代傳記叢刊・綜錄類⑦
周駿富輯

國朝耆獻類徵初編

(四)
(五)

卷三二〇至
卷三二九

(清)李桓輯



明文書局印行

W. C. C. C.

國朝詩餘類攷初編卷三百二十目錄

將帥六十

蒲立勳

徐慶超

閻俊烈

多貴

富明阿

八十六

圖明阿

富亮

姜長齡

武光琳

馬金魁

蘇清阿

蘇勒當阿

福祥

張琴

唐文淑

蘇兆熊

福克精阿

171-004

國朝耆獻類徵初編卷三百二十

通奉大夫前署江西巡撫江西布政使司布政使湘陰李桓輯
將帥六十

蒲立勳

蒲立勳福建侯官人由行伍歷拔千總嘉慶十七年署金門鎮標
左營守備時海盜駱廬仔等在金門洋面肆劫立勳偕守備張琴
等督領舟師分路追剿尋駛至金門外洋豫截其分竄之路奮力
合剿槍礮齊施獲王右等十餘名餘匪落水淹斃者無數奪其船
一並搜獲礮械火藥多件二十三年擢福甯鎮標左營外海水師
守備道光元年超擢金門鎮標左營遊擊五年升廣東海門營參

將尋調龍門營參將六年署澄海協副將七年升龍門協副將八年署碣石鎮總兵九年兩廣總督李鴻賓保奏立勳諳習外海情形巡緝訓練俱屬謹飭堪勝水師總兵之任尋署南澳鎮總兵十年六月以鎮標左營及銅山營兵丁貧苦請撥借庫貯穀銀每兵一名給銀一兩自行零糴並請於各兵餉內自七月起至十一月止分月扣收歸還以濟兵力而重庫款 命如所請行七月擢浙江温州鎮總兵十一年五月因母老陳請終養 允之十三年卒

右 國史館本傳

徐慶超

徐慶超廣東鎮平人乾隆六十年武進士授藍翎侍衛嘉慶五年選授閩浙督標右營守備六年署興化城守左營都司獲疊劫巨盜張長等五人九年回本任十年護連江營水師遊擊因艇匪蔡牽肆擾臺灣慶超隨浙江提督李長庚在浮鷹西涌等洋面剿捕殲擒甚夥匪船竄出外洋十一年九月偵知蔡逆匪船在竿塘一帶洋面復隨李長庚率舟師追剿擊斃賊目蔡添來生擒零匪百餘十一月督官兵獲洪第等十四人於奇達汛奪取器械無算乘勝追至苔菜塘洋面沈其船一擒賊目四十二年帶兵船巡哨至黃岐洋獲接濟賊匪食物奸民林開魁等三人軍政卓異十三年

補興化城守左營都司十七年調臺灣北路左營都司十八年升
陸路提標右營遊擊二十一年獲鄰境盜犯多名送部引見得
旨徐慶超著發往福建以參將用二十二年補提標中軍參將道
光三年署興化城守營副將四年升浙江紹興協副將六年調杭
州協副將九年閩浙總督孫爾准保奏堪勝陸路總兵得旨徐
慶超著送部引見十一年擢福建建甯鎮總兵十三年卒子紹芬
浙江候補縣丞

右 國史館本傳

閻俊烈

閻俊烈山東濟陽人乾隆五十四年由武舉分發本省撫標右營
效力五十八年補兗州鎮左哨把總五十九年升沂州營大興鎮
汛千總嘉慶元年川陝楚教匪滋事命內大臣額勒登保德楞
泰往剿俊烈隨營效用三年擊四川首逆王三槐徐添德及林亮
功等賊匪奮勇出力賞戴藍翎四年二月生擒首逆羅其清俊
烈在事有功賞斐凌阿巴圖魯名號四月升武定營中軍守備
五年正月升沙溝營都司七月隨提督七十五帶兵剿賊蔡營鄰
水境內樊人傑股匪由七孔溪一帶竄入俊烈偕遊擊鄭啟貴等
由山溝抄截七十五督兵直衝追剿數十里殲賊八百餘生擒樊

逆之弟樊人聰六年三月七十五師次寶塔偵知陳朝觀股匪從陽橋壩折屯竹園坪俊烈偕都司羅思舉等夜擣賊營賊潰散五月七十五率兵由一碗泉前進時藍號賊匪屯聚陝省平利縣之大渝河俊烈偕侍衛武隆阿先赴茅壩三斗種山後設伏賊向茅壩奔竄伏發立斃百餘人賊搶據山梁我兵槍石並發殲斃無算尋升高唐營遊擊七月藍白二號賊匪合湯劉二逆股匪分竄滋擾俊烈遇賊於東湖保康地界擊斃賊首王鎮賢賊潰散八月七十五帶俊烈等折回川東剿苟文明分股賊匪師次奉節賊眾分屯奉節之楊柳壩等處俊烈偕侍衛武隆阿夜擣賊巢賊退據山阿負隅抗拒我兵大隊合攻賊敗走大兵向夔州進發行抵開縣

適苟樊股匪竄至譚家灣俊烈與參將鄭啟貴分路進剿於溫湯井地界突遇賊匪千餘由山梁下壓奮力擊退之旋有七里坪東壩溪一帶竄出股匪俊烈當先衝擊追殺數十里殲獲多名九月七十五追剿苟逆等股至亢河間有賊匪千餘由陝竄至首逆崔宗和胡明元在老鴉鋪壽家山等處屯紮令俊烈等領馬隊出望鄉坪捕剿賊遁老林寨內俊烈首先衝入擒斬二百餘名骸受石傷十一月俊烈隨總兵豐紳追剿高見奇股匪見奇就獲下部議敘七年五月升陝西西安城守營參將六月俊烈在二竹搜捕零匪適逆首王國賢屯踞木瓜坪卽乘夜率兵馳擊矛傷王國賢撲河淹斃疏入 諭曰聞俊烈圍剿賊匪不分畛域矛傷王國賢殲

斃樊人傑之子弟餘匪剿洗殆盡殊屬可嘉著加恩賞給參將銜
遇缺卽補尋以俊烈業於五月升補參將復 賞加副將銜十一
月俊烈率兵從界嶺以南沿太平邊界偵剿零匪聞黃柏扒老林
有賊潛伏林箐深密馬不能行俊烈率遊擊湯占先等徒步前進
昏夜遇賊身受矛傷尋黃藍線等號股匪千餘人由雲萬一帶奔
竄經川兵偪剿緊急又思竄入陝境俊烈等帶兵星夜深捕至青
岡坪賊占險抗拒我兵三路抄擊大敗之生擒首逆葉紹隴僞先
鋒謝登貴十二月補貴州大定協副將九年二月平利之千家坪
有賊滋擾俊烈偕總兵王兆夢分投截剿賊由正陽河屯西溝老
林設伏林內俊烈追至朱橋河賊敗走我兵躡至林頂伏賊突出

俊烈連受矛傷猶能戰賊向讓河腦老林竄逸疏入 上以俊烈
係帶兵之員身受矛傷恐其部下兵丁單弱 命西安將軍賽沖
阿赴俊烈一路協剿尋賊於波羅河與苟朝九等零匪合夥肆擾
上以此股賊匪輾轉奔竄人數轉增 命額勒登保詳細籌酌合
同督剿三月賊往來馬溪客僧河一帶我兵四路夾攻殲殺首夥
數十名賊勢愈蹙捷入 恩賞有差十年正月巴山老林零匪未
淨俊烈偕總兵田朝貴分兵數路梭織排搜尋卽掃數蕩平十二
月升甘肅巴里坤總兵十六年調陝西西安鎮總兵十八年十月
河南敎匪李文成等在滑縣滋事 上命陝甘總督那彥成督兵
往剿那彥成以俊烈勇往素著請 旨派往山東帶兵 諭曰此

次剿捕賊匪山東一路帶兵將領不能得力朕深爲廬念閻俊烈
朕素知其勇往卽令其馳赴山東幫同同興帶兵奮力截剿則東
面可免疏虞尋偕領隊大臣蘇爾慎帶滿漢兵一千名赴開州協
辦軍務屢戰有功開州邊界肅清經欽差大臣協辦大學士戶部
尚書托津奏入 諭曰開州邊界賊匪洗淨盡所辦實屬可嘉
閻俊烈前經餽送興奎銀兩亦有應得之咎此次督兵奮勇著加
恩免其議處仍交部議敘先是烏魯木齊領隊大臣恆傑呈控都
統興奎收受屬員禮物 上命將軍松筠鞠之俊烈餽送屬實至
是免其議處十二月調河南河北鎮總兵十九年閏二月復調陝
西西安鎮總兵四月丁父憂二十一年七月服闋八月擢湖北提

督二十四年以失察屬員被控劣蹟部議降三級調用上以俊烈前在軍營屢著勞績改爲降二級畱任道光元年以傷病舉發開缺旋籍五年授湖南提督六年休致十三年卒子肇琪一品廕生戶部主事肇雙候選衛千總

右 國史館本傳

171-016